



## 'n Roep om waarheid

Om Blitsposte ontvang, stuur 'n e-pos na [bladuitleg@nhk.co.za](mailto:bladuitleg@nhk.co.za) of [grafies@nhk.co.za](mailto:grafies@nhk.co.za) en versoek dat u naam op die versendingslys geplaas word.

Nuus, berigte en kort kommentaar (uiters 100 woorde) aan [produksie@nhk.co.za](mailto:produksie@nhk.co.za)

Webblad van die Hervormde Kerk [www.nhka.org](http://www.nhka.org)

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

**Die Suid-Afrikaanse samelewing word doodgewurg deur leuens en korruptie. As ons die leuen sou kon doodmaak, sou baie ander wandade opgeklaar wees. In elke volgende swerf wat oopbars, moet die hoeve probeer vasstel wat die waarheid is.**

Waarom is dit so? Almal in hierdie land is tog nie kinders van dié een van wie Jesus gesê het dat hy die vader van die leuen is nie, 'n moordenaar van die begin af. Hoe gaan ons dié bose web opruk en vernietig? Die situasie herinner aan die reisiger wat by 'n kruispad kom. Skielik is daar geen verdere padaanwysing nie. Wat nou? Waarheen nou?

Daar is in hierdie land onder al die inwoners 'n groot persentasie mense wat nie die duiwel nie, maar God as Vader bely. Leef ons uit dié waarheid?

Is wat ek oor 'n ander sê, die waarheid? Of is dit bloot 'n geskinder? Ons moet besef dit los nik op om die mond vol te hê oor al die leuens en korruptie nie, maar dan is ons eie tong 'n vuur, 'n onbedwingbare kwaad vol dodelike gif wat ons hele menswees besmet (Jak 3).

Die roep om waarheid dring nog dieper. Rubriekskrywers, briefskrywers en nog ander praat graag oor God en die Kerk, ongelukkig baie keer op hoorsê; in plaas daarvan dat ons liewer *met* God praat, Hom in gebed aanroep. Deur Christus is God op hoor-afstand van ons af. Die Heilige Gees gee aan ons die woorde om tot God te bid. En dit kan 'n wêreld vol gif en onreg genees.

Met hierdie uitgawe betree *Blitspos* sy 16de jaargang. Oor hierdie jare is die gemeenskap van gelowiges gedien deur geloofstoerusting en verspreiding van kennis oor die Kerk en sy mense. Ons vertrou dat die pad vir dié nuusmedium van die Kerk goed en geseënd sal bly.

Hoe diep en dreigend die land- en wêreldssituasie ook al mag word, is dit nie rede vir gelowiges om neerslagtig te raak nie. Die Kerk moet in sy verkondiging en ook in sy geskrewe media die beste gebruik maak van elke geleentheid om in geloof op te bou en die waarheid te dien; ook in die sekulêre media wanneer daar aan die Kerk ruimte gegun word. Lidmate is opgewonde as hulle midde-in al die skokkende, neerdrukkende berigte van verval, leuenagtigheid en gebrek aan respek vir lewe, die naam van een van hul Kerk se leiersfigure of teoloë opmerk. Daar word gesmag na 'n rigtinggewende woord uit die Skrif om die somber huidige tydsgewrig teen Bybelse lig te verwerk. Maar dan volg bitter teleurstelling as jy soms 'n relaas oor oppervlakkige onbenullighede te lees kry.

Die Kerk moet aanhou om die owerheid aan sy roeping te herinner in die beproefde formulering van wyle prof JP Oberholzer: Die Kerk verwag van die owerheid om die veiligheid en lewenskwaliteit van al sy onderdane te bevorder.

Ons weier om langer deur leuens tot slawe van magteloosheid en mislukking verneder te word. Bly getrou aan die woorde van Jesus... *en julle sal die waarheid ken, en die waarheid sal julle vry maak* (Joh 8:32).

Die vreugde en krag van die Bybelse verkondiging is dat God, ondanks alle teenstrydige ervarings, in beheer is, en op sy tyd en wyse in die dreigende gang van die geskiedenis sal ingryp.

Wat nou? Waarheen nou? Uit die Bybel klink die antwoord: Kom, hierlangs. Ek sal jou die weg wys.

## Lief en leed

- Emerituspredikant **ds WPF (Piet) van Wyk** (74) is Saterdagnag 28 Januarie in sy slaap oorlede. Die troosdiens vind eerskomende Vrydag, 3 Februarie, om 11:00 plaas vanuit Gemeente Drie Riviere-Oos, hv Hawthorn- en Almondstraat, Drie Riviere, Vereeniging. Predikante wat die diens gaan bywoon, word versoek om hul togas te dra. Ons innige simpatie gaan aan mev Anna Marie van Wyk en hul familie.



Ds Piet van Wyk

- Ons het verneem dat **mnr Kobus Viljoen**, vroeër administrateur van die NHKA, gedurende September 2022 'n knievervanging ondergaan het. Hy het ongelukkig 'n kiem in die been opgetel en die prostese moes weer verwyder word. Tans sterk hy tuis goed aan en wag hy vir 'n datum om die knievervanging te voltooi. Ons bid hom sterke en spoedige beterskap toe. Mnr Viljoen en sy vrou, Gonda, is lidmate van Gemeente Pierneef.



Mnr Kobus Viljoen

- Baie geluk aan **ds Liza en Wilhelm Jansen** van Witbank-Suid met die geboorte van hul seun, Wilhelm, op 12 Desember. Hy het 3,6 kg geweeg en was 54 cm lank. Ds Liza sê: *Almal was gesond na die geboorte en ons harte is baie vol.*



Wilhelm Jansen

- Ons hoor steeds van gemeentekinders wat goed presteer het in die **Nasionale Senior Sertifikaat-eksamen**. **Timoné Manders**, dogter van di Jimmy Manders en Janine Bevolo-Manders van Witfontein, het ook ses onderskeidings behaal. En **Taneli de Bruin**, dogter van ds Carel Johann en Janeke de Bruin, oor wie ons verlede week berig het, het nie net vyf onderskeidings behaal nie, maar was ook Hoërskool Wonderboom se toppresteerder. Baie geluk!

- **Ds JP (Johan) en Nandi du Preez** van Gemeente Van der Hoff in Groblersdal en hul gesin het Sondag 29 Januarie van hul gemeente afskeid geneem. Hulle emigreer na Rosebud, 80 km van Melbourne in Victoria, Australië. Hulle kom 1 Maart aan in Rosebud. **Op die foto** is van links na regs Eduan, Nandi, Johan en Jean. Hul jongste seun, Eduan, is die dubbelganger vir swimmer Johan op die telenovelle *Diepe waters*.



Ds Johan en gesin

- **Proff Yolanda Dreyer en Christina Landman** het die afgelope week erelidmaatskap ontvang van die Werkgemeenskap vir Praktiese Teologie in Suid-Afrika by hul jaarlikse kongres. Dit word toegeken aan lede vir hul jarelange akademiese bydraes nadat hulle afgetree het.

- **Die volgende predikante verjaar tot 10 Februarie, en word hartlik geluk gewens:**

- Vrydag 3 Februarie: Ds MH (Tinus) Mc Donald (63) (siekte-emeritaat)
- Saterdag 4 Februarie: Ds C (Chantelle) Maree (32) (Meyerton-Suid)
- Sondag 5 Februarie: Ds L (Lisa-Mari) Prinsloo (38) (Centurion-Oos)
- Maandag 6 Februarie: Dr AMT (Andorette) Hill-Jowett (55) (siekte-emeritaat) en ds JA (Johan) Holtzhausen (57) (Vryburg)
- Woensdag 8 Februarie: Ds AJH (Jakkals) Janse van Rensburg (66) (emeritus/Paarl)
- Donderdag 9 Februarie: Di D (Dolf) Bester (34) (Boksburg),  
IF (Erika) Ferreira (32) (buiteland),  
LH (Lydia) Miller (51) (Villiers),  
F (Ferdie) Nortjé (60) (siekte-emeritaat) en  
F (Freddie) Nortjé (60) (emeritus/Bergsig)
- Vrydag 10 Februarie: Di D (Dalene) Lourens (51) (Selcourt/Springs-Noord) en IJ (Jaco) Vogel (43) (Rooihuiskraal)



Prof Yolanda Dreyer

## Gemeentes en bediening

- **Kerkspieël 2022-'23** is weereens, soos in die verlede, 'n geleentheid om met 'n wetenskaplike ondersoek 'n geheelbeeld van die Kerk te kry en die hartklop van die gemeente te hoor. Die gemeente-opname doen navraag oor 'n wye verskeidenheid aspekte van die gemeentelike bediening, asook die demografie en funksionering van die gemeente. Dit help ons om te verstaan waarmee ons besig is en behoort te wees. Die resultate bied 'n beeld van die

Hervormde Kerk en is nuttig vir sinodale leierskap om doelgerigte beplanning te doen met die oog op dinamiese en volhoubare bediening in die Kerk. Dit is daarom vir die Hervormde Kerk baie belangrik dat elke gemeente hierdie opname sal doen. Die vraelys is reeds 'n geruime tyd gelede aan gemeentes gestuur met die versoek dat predikante en skribas verantwoordelikheid sal neem om dit aanlyn te voltooi. Tot op datum het minder gemeentes as wat werklik nodig sou wees om sinvolle en bruikbare resultate te verkry, egter hul voltooide opnames teruggestuur. Ons vertrou dat die ander gemeentes ook aan hierdie versoek sal voldoen om **teen 10 Februarie 2023** die vraelys aanlyn te voltooi. Kontak ds Frikkie van Wyk ([gfvanwyk@nhk.co.za](mailto:gfvanwyk@nhk.co.za)) of Karen Breedt ([karen@nhk.co.za](mailto:karen@nhk.co.za)) indien u enige navrae het.

- **Gemeente Losberg** is in Mei 1925 gestig. Oor twee jaar is die gemeente 100 jaar oud. Al die predikante wat nog met ons is, asook gemeenteledere wat sedert 1925 by die gemeente betrokke was, word vriendelik versoek om enige inligting, foto's, staaltjies en gebeure waaroor hulle beskik, te stuur aan Frikkie Boshoff per e-pos ([frikkiesan@gmail.com](mailto:frikkiesan@gmail.com)). Baie dankie by voorbaat!
- **Gemeente Horison Roodepoort** benodig van die **letters en syfers** wat vroeër op borde in kerkgeboue gebruik is om die erediens se liturgie aan te kondig. Die gemeente gebruik dit nog, maar soms is dié wat hulle nodig het, nie in hul versameling nie. Kontak Petro Matthews by [williepetromatthews@gmail.com](mailto:williepetromatthews@gmail.com) indien u kan help.
- Die e-posadres wat op bladsy 167 van die 2023 Almanak by **prof JH (Jan) Barkhuizen** se inligting verskyn ([jan.barkhuizen@telkom.co.za](mailto:jan.barkhuizen@telkom.co.za)), funksioneer nie meer nie. Sy huidige e-posadres is [jan.barkhuizen47@gmail.com](mailto:jan.barkhuizen47@gmail.com).
- Die e-posadres wat op bladsy 173 van die 2023 Almanak by **ds JH (Jan) Kay** se inligting verskyn ([jhkay@telkom.co.za](mailto:jhkay@telkom.co.za)), funksioneer nie meer nie. Sy huidige e-posadres is [jkay10@gmail.com](mailto:jkay10@gmail.com).

## Vergaderings

- Donderdag 2 Februarie: ADV Dagbestuur
- Vrydag 3 Februarie: Oudit- en Risikokomitee
- Maandag 6 Februarie: Plesion Direksie
- Donderdag 9 Februarie: Redaksie van *Die Hervormer*
- Vrydag 10 Februarie: Moderamen

## Kerklike publikasies

- **Aan ons lesers wat *Die Hervormer* per pos ontvang.** Die oneffektiewe verspreiding van *Die Hervormer* via die Poskantoor moet ongelukkig nou gestaak word. Individue, gemeentes en instansies wat hul eksemplare tot en met die Januarie/Februarie 2023-uitgawe per pos (nie koerier nie) ontvang het, kan steeds die publikasie op die Kerk se webblad lees, by <https://nhka.org/die-hervormer/>. Belangstellendes wat 'n pdf-weergawe van *Die Hervormer* wil ontvang, kan hul e-posadres stuur na [bladuitleg@nhk.co.za](mailto:bladuitleg@nhk.co.za).

- **Gemeente Randburg se Gedenkblad vir die 75-jaar-herdenking (1947-2022)** is nou beskikbaar. Die Gedenkblad is 'n skatkis vol herinneringe en geskiedenis oor die afgelope 75 jaar heen uit die mond van mense wat hier is/was om die begin van alles te kon sien gebeur. Dit is opvallend hoeveel mense van letterlik reg oor die land en selfs oorsee met hierdie gemeente 'n besonderse band gehad het. Heelwat lidmate vertel dat hul kinders hier gedoop is en dat dieselfde kinders teruggekom het om hier te trou en ook hul kinders hier te doop. Hierdie bundel is 'n samevatting van geskiedenis, staaltjies, statistieke en foto's waarmee ons aan die vorige en huidige lidmate iets wil teruggee vir hul bydrae om hierdie gemeente so 'n besondere plek te maak in almal selewens. Die Gedenkblad is beskikbaar teen **R200 elk plus posgeld**. Kontak die administratiewe beampte, Elna van der Walt, by [elna@nhk-randburg.co.za](mailto:elna@nhk-randburg.co.za) of 011 787 4983. **Bankbesonderhede:** Ned Herv Kerk Randburg; Nedbank Randburg; takkode 198405; rekeningnommer 198 425 1082.



## Studentesake

- Die **opening van die Hervormde Teologiese Kollege (HTK)** vind op **Woensdag 15 Februarie om 10:00** by **Philadelphia** plaas. Die prediker is **dr Hein Delport**, en **dr Annelie Botha** sal 'n referaat lewer oor *Morele verwonding: Oorsake en verskillende vorme daarvan, vanuit 'n pastorale perspektief*. **Dr Thinus van Staden** lewer sy groeteboodskap as voorsitter van die Kuratorium. 'n Vingerete word na afloop van die verrigtinge in die saal bedien. Almal is welkom en belangstellendes wat die geleentheid wil bywoon, moet by Clarika Hattingh by [clarikah@nhk.co.za](mailto:clarikah@nhk.co.za) bevestig.
- **Studentebehuising. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasilitete, óf eenmenswoonstelle. Skakel dr Chris le Roux by 079 495 3239 of stuur 'n e-pos na [stellenbosch@nhk.co.za](mailto:stellenbosch@nhk.co.za) vir meer inligting.
- **Studentebehuising. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasilitete. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na [nhkphiladelphia@gmail.com](mailto:nhkphiladelphia@gmail.com) vir meer inligting.

## 'n Gedig

### Gedenkdiens Sheila Cussons

Kapel Nazareth House, Kaapstad, 29 November 2004

'n Vet vlieg loop net voor die hoogaltaar  
op die blink mosaïek van groen en blou;  
natuurlik het jyself hom ook gewaar:  
hy lóóp onder die lof aan God oor jou.

Ek het gewag: hy sou êrens gaan sit  
en handjies joods vryf (so het jy gedig),  
maar toe ons die Magnificat saam bid,  
het hy kom bodder rondom my gesig.

Was dit verbeelding dat jy iewers lag:  
"Hoe anders? Gun die vlieg sy kerkbesoek!"  
Maar dis die viering van jou nuwe dag  
– en toe ek preek: daar sit hy op my boek.

Sheila, tussen gebede bly ons bieg:  
oor al ons heiligheid loop daar 'n vlieg.

### IL de Villiers

(Uit: *Jerusalem tot Johannesburg*, 2005)

## Toerusting

- **Gratis Ouerbegeleidingskursus**  
**NHKA Centurion-Oos, Napierweg 103, Lyttleton**  
**Tema: Hoe leer ek my kind waardes?**  
Gefokus op ouers van voorskoolse en laerskoolkinders  
Kom luister, leer en gesels saam!  
Voorsiening vir versorging van kinders gedurende aanbieding  
Vir meer inligting, kontak Jaco Beyers by 083 417 5803  
Woensdae 19:00 by die kerk: 8 en 15 Februarie, en 1 Maart

## Barmhartigheid

- **NHSV Studielingsfonds.** Om te studeer, het baie voordele, maar is nie altyd vir almal bekostigbaar nie. Dit bring vir studente dikwels groot bekommernis en hartseer, en ouers voel dat hulle hul kinders teleurstel. Dit is waarom die NHSV deur middel van haar Studielingsfonds graag jongmense van die NHKA help om verder te studeer in enige studierigting. Leninghouers kan ook in aanmerking kom vir meriete- en prestasiebeurse. In 2022 is 36 toekennings gemaak met 'n gesamentlike waarde van R378 000. **Aansoeke vir 2023 het reeds gesluit** en 39 aansoeke is ontvang. Om die Fonds te sterk, het die Kommissie van die AKV bepaal dat **Sondag 12 Februarie se dankoffers** aan die NHSV toegestaan moet word vir die aanvulling van die NHSV Studielingsfonds. Baie dankie aan al die gemeentes van die Kerk wat hul deurkollekte van 2022 en ook in vorige jare oorbetaal het aan hierdie Fonds. Elke bydrae word opreg waardeer en verseker dat daar nog 'n paar jongmense gehelp kan word om 'n beter toekoms binne te gaan. Kom ons help ons Kerk se jongmense om as studente hul oog op die toekoms te kan hou, terwyl hulle met vreugde in die oomblik van elke dag teenwoordig is. Hulle het nog baie om te leer en baie om te vermag. Besoek gerus die NHSV se webblad [www.nhsv.org.za](http://www.nhsv.org.za) vir meer inligting. Oorbetalings kan gedoen word deur die volgende besonderhede te gebruik: NHSV Hoofbestuur; ABSA tjakrekening 4051454181; verwysing: Gemeentenaam + Deurkollekte.
- **Belfast Rusoord.** Kom raak rustig in ons goed toegeruste kamers met opgeleide personeel en ander vrolike seniorburgers. Ons bied 24-uur mediese versorging; CCTV; 24-uur-toegangsbeheer; drie gebalanseerde maaltye per dag; en aktiwiteite vir elkeen.  
Semiversorgend: R6 180  
Verswakte bejaardes: R6 720  
**Woonstelle (selfversorgend)**  
Enkelwoonstel (*Bachelor*): R2 830  
Eenslaapkamer: R4 500  
Tweeslaapkamer: R6 070  
Kontak ons bestuurder vir enige navrae  
Riana de Villiers 013 253 31211 / 063 663 7449 [manager@belfastrusoord.co.za](mailto:manager@belfastrusoord.co.za)
- **Athalia Uitreik in Bloemfontein**  
**Verblyf vir en versorging van bejaardes en persone met gestremdhede**  
Enkel- en deelkamergeriewe in 'n huislike atmosfeer  
Verblyf met 3 etes ingesluit  
Verblyf sonder versorging R1 700 per maand  
24-uur-versorging onderhandelbaar  
(maksimum R8 000 per maand deelkamer)  
Navrae: 079 826 6363 / 084 023 0315 / 051 522 6089  
[navrae@athalia.co.za](mailto:navrae@athalia.co.za)  
[www.athalia.co.za](http://www.athalia.co.za)
- **Louis Trichardt-behuising kompleks vir bejaardes** in Danville, Pretoria, bied kamergeriewe met twee etes per dag teen R3 850 per maand. Vir meer inligting, kontak mev Vicky Muller by 012 386 5310.
- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasilititeit sluit in 24-uur-versorging, drie maaltye per dag en sekuriteit. Behuisingsfasilitete teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord**  
Seniordal is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in Rietondale, Pretoria, wat bekend is as 'n stil, veilige, boomryke omgewing en 'n voëlparadys. Seniordal beskik oor 24-uur-veiligheidsdienste en toegangsbeheer, en

bestaan uit die volgende woonstelle:  
Enkelwoonstel (*Bachelor*): R510 000  
Eenslaapkamer: R515 000  
1½-slaapkamer: R520 000  
Tweeslaapkamer: R560 000  
Navrae: Salomie Stolz 012 329 4318 / 083 308 0520

## Fondsinsamelings

- **Oornagfasiliteite: Seniordal.** Seniordal beskik oor oornagfasiliteite wat ideaal is vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parkering en 24-ur-sekuriteit. **Vir navrae oor tariewe en vir besprekings**, kontak Salomie Stolz gedurende kantoorure 08:00-12:00 by 012 329 4318, of na ure by 083 308 0520.

## Betaalde advertensies in hierdie nuusbrief

Die koste van advertensies is **R250 per plasing (BTW ingesluit)**. Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal. Meer besonderhede oor advertensies kan aangevra word van [produksie@nhk.co.za](mailto:produksie@nhk.co.za).

## Gebed om krag

Vader, die woord wat ons van U ontvang,  
sal nie onbeantwoord na U terugkeer nie.  
U woord sal magtige dinge laat gebeur,  
en die doel bereik wat U bestem het.  
Ek smeek U om krag, gebaseer op u woord.  
U woord leer my dat ek soos gras is wat verdor,  
en my prestasies soos blomme wat verlep,  
maar u woord, my Heer, staan vir ewig.  
Selfs al sou hemel en aarde vergaan,  
sal die woorde van Jesus altyd bly.  
Hoe geseënd is dié wat hul krag in U vind!  
Al dwaal hulle deur valleie van angs,  
sal hulle steeds nuwe krag ontvang.  
Heer van alle magte, hoor my bede!  
Amen.

[kenboa.org/prayer/prayers-for-strength](http://kenboa.org/prayer/prayers-for-strength)

(Afrikaanse verwerking: Tessa Oppermann)